

清代昆陵名人小傳稿

蔣維喬署簽

下冊

中華民國三十三年十一月初版

清代毗陵名人小傳二冊

每部實價國幣貳百圓

編纂者 張 維 釀

印刷兼
發行
者

上海正陽路（同孚路）一〇二弄六號
常州旅滬同鄉會
電話 三 四 一 二 八

清代毗陵名人小傳稿卷七

邑後學張惟驥季易纂

鄒樹

樹字潤安號閨菴武進人家貧無力就傳勤苦自勵於書無所不讀雖盛夏暑披覽不輟其於日月之疾徐盈縮星辰之遲留伏逆江淮河漢之條理南朔東西之阨塞險要皆能洞悉原委曉暢機宜故發於詩古文詞卓然可傳道光元年詔舉山林隱逸鄉先輩議以名上於朝樹寓書建議曰某德薄能鮮長爲鄉人以沒世乃其分耳若抗跡邱園弋釣華譽鄉黨好者不爲而予謂我願之乎議遂止此可以觀所守矣隱於醫藉以事玄於醫實事求是如經生之於漢學也

湯建中

建中字德卿一字允叔武進人道光元年舉人教習知縣分發東河官運河同知至東河時總河嚴公烺一見詢全河形勢答問悉中竅要尋借補河內

縣丞轄有水碓數十座民田藉資灌溉官吏向視爲利藪建中下車盡捐禁約一從民便廳員某科塲不及數總河檄建中往查已繕白簡以某缺授建中建中至與某期三日購如額出結馳稟某得無恙趙申嘉贈詩有傳遍官聲差慰藉小湯文正繼睢州蓋謂此也

惲秉怡

秉怡字潔士號梧岡武進人道光元年舉孝廉方正敦孝行稱里閭嗜書畫皆入能品而書尤善嘗受法於莊然一然一師歐陽率更父子而秉怡以徐季海爲宗論者以爲各有勝處畫先學竹後學山水沉雄娟秀克承家學歲暮寒窗圍爐呵凍作畫不輟蓋深得此中真趣者也

臧相子熙

相字木齋武進人庸子道光元年舉人傳其父業有漢學師承記分別漢宋畛界劃然子熙字仲金縣學生覃精經訓能世其家

顧文炳

文炳字子明武進人道光元年舉人博通訓詁十三經義疏能條舉無遺

蔣學沂

學沂字小松陽湖人工駢體文及詩詞清句麗詩文不難於麗而難於清學沂得之矣

劉嗣富

嗣富字鐵文陽湖人諸生工詩詞

管繩萊

繩萊字孝佚亦字孝逸晚號艾齋別號屨提居士武進人世銘孫風幹倜儻文詞瑰磊有奇氣官安徽含山知縣多惠政善斷疑獄去後含山部民感念遺愛歲附糧艘饋遺食米百斛至終其身世更嘆爲循吏不僅文人已也詩才奔放古文辭簡靜樸茂

惲彙昌

彙昌字子駢陽湖人諸生工篆書善畫山水性高曠不諧於俗罕與外事咸豐十年髮匪陷毗陵自經

劉可培

可培字阮山武進人博學多聞客閩皖豫滇到處爭迎詞人周之琦其高足也性耽風雅善詞曲

謝應芝

應芝字子階號浣村晚號蒙泉子陽湖人貢生工詩古文辭精研經學擴漢儒之奧而立身致行一以宋儒爲準則

史秉直

秉直字洵侯陽湖人道光三年進士以知縣分發甘肅署伏羌縣關外有路斃者秉直詣驗得傷而傷人者無主名乃微服夜訪酒帘中燈火熒熒聞二人私語曰甲於某日與乙偕行乙死而甲不見何也直前叩其實遣役物色之獲兇置之法補崇信某佃負租不償斧戕其妻以誣業主鄰里無異辭秉直疑之覆訊得實旋調渭源渭源爲西疆孔道大軍征張格爾羽書絡繹秉直供張車馬事辦而民不擾凱撤大吏敍勞入奏時丁父憂歸奉旨歸部卽選服闋補河南西華兼理扶溝扶溝村民家夜火與幼子皆焚死唯其婦以呼救免秉直往勘見火自外入知必有故推得挾讐縱火者抵罪調鹿邑以

緝獲左道亂民奉旨以同知用調署祥符以河決大工告成擢汝州會旱禱雨風穴山遇勞疾卒平生盡心民事鉏豪強卹災患敦教化所至翕然從風其卒也遠近爲之流涕光緒間入祀名宦祠

言啓方

啓方字俛卿號芝泉武進人道光元年舉人幼穎悟讀書過目輒記署歲工文博覽羣籍潛心古學尤精詩大挑知縣因吏事繁恐廢學改學官選授下邳學正十九年以老病告歸年餘卒

史福臻

福臻字會五一字荔洲陽湖人道光二年舉人官安徽太和縣教諭於學無所不窺尤長於詩少時好雄傑瑰麗之作後以抒寫性靈超淡自得爲宗

趙仁基

仁基字厚子陽湖人道光六年進士官至湖北按察使工詩在官判決滯獄感格兇頑至卒宦橐蕭然人謂不墜家風

程應權

應權字子衡武進人道光六年進士改翰林院庶吉士散館授編脩工詞

談 澐

澐字鴻儒陽湖人道光八年舉人大挑知縣官四川墊江縣知縣工詞

符 瑩

瑩字玉相號琴臺武進人道光八年副貢宗室文黼宸將軍深器之蔣中丞文慶亦曰符君非特經師洵人師也性友愛弟卒悉歲入供其孤寡至不能自畜其子使依外家以長焉隨吳孝銘視學於閩閩人啗以關節峻拒之不納年六十五卒

董似穀

似穀字粹夫號蓉初武進人道光十一年順天鄉試第一十八年進士館選以爛史例累充武英殿纂修國史館總纂起居注總辦擢洗馬旋授江西南安府知府未之官以校刊二十三史成賞鹽運使銜再權糧儲道同治間重修江西通志派充提調詳定體例咸以爲善書成遂引年歸怡志林泉不與外事卒年八十四

湯成烈

成烈字果卿陽湖人直隸清苑籍道光十一年舉人官浙江玉環同知精史學常州詞人自張皋文翰風詞選出詞格爲之一變嘉慶以後與雍乾間判若兩途成烈工力甚至每以全力運轉有約千篇於一闕感萬里於寸徑之概聲情激越感遇深遠尤爲可歌可泣

吳頡鴻

頡鴻字嘉之號笛江武進人道光十三年進士以卽用知縣分發山西署五臺靈石臨汾補崞縣頡鴻工古文及駢儷詩詞爲諸生時名重鄉里與趙申嘉莊縉度周儀顥陸容徐廷華汪士進稱毗陵後七才子其官山西多善政崞縣苦寒民輒僵死頡鴻歲置羊皮衣褲三千給之尤多狼患爲禁狼文告於神捕治之狼患竟息

陸容

容字蓉鏡陽湖人諸生爲文豔麗後七子中最爲淪落不偶

張鏡淳

鏡淳字拭之號蘭洲武進人道光十三年進士分發山東知縣署黃縣繼縣補授堂邑縣所至有聲每讞囚爲之寢食俱廢曰此死獄也吾爲之求生不得耳以不樂煩劇呈請改教選授蘇州府教授咸豐十年四月粵逆陷蘇州城鏡淳正衣冠坐堂上賊至欲褫其衣冠而生之乃大罵遂遇害事聞優卹如例入祀昭忠祠

汪 陳

陳字仲穆陽湖人道光十四年舉人淡於榮利不求仕進常居京師教授弟子詩宗陶韋篇帙不富而雅韻欲流

張 璇父銓 子達 咸熙 成煦

璇字春帆號湘雲武進人道光十四年舉人四試禮部三薦不售遂以大挑二等授泰州學正洎任後與州之士論文講學循循善誘擇其尤而獎借之士風丕變時值洪楊之禍咸豐十年江南郡縣相繼淪亡邑之人相率挈眷渡江避難其至泰州者虛廨舍居之日久來者衆廨無廁足地乃賃廡以處日給以糧僦居至半城市顧力不能久任爲之愀然邑人士之仕京外者聞

之咸願助廉以成其事董之數年全活無算其後邑人之避難者不問其所至而知其至泰州也其至泰州者無一人不得全其生也同治四年年五十九以勞瘁卒於官驤生也晚不及詳先人之休聲美實今所聞者什伯之一耳少工文善書而不求赫赫之名父鋌字搢之道光元年恩貢生博學多聞尤工尤王體制舉文十三上秋闈未遇齋志以卒子三達成熙成煦成煦驤父也達與成煦俱諸生沉潛好學亦有文名

陸敏政

敏政字子忠武進人道光十四年舉人幼通爾雅說文稍長博涉諸經馬鄭荀王諸家及唐宋疏證無不究其家法學使者彭春農甚器之以爲可繼閭百詩惠定宇之後而升之學海堂也家貧常爲四方之遊劉瞻巖視學山東吳平次學士視學江西龔靜軒宮詹視學廣東皆聘爲襄校在廣東時巡捕官以關節通嚴拒之後選鹽城教諭廉介樸素如諸生時卒年七十一

李以謙

王士儀

以謙字地山武進人花卉學南田山水仿思翁墨暈秀潤又工書隱居不仕

與同里王士儀並有書名士儀字心一

董文毅

汪在豐 沈德龍 劉 儒

文毅字六泉武進人善弈道光間學士大夫往往喜談弈理於是士爭趨之一時以國手名天下者十八人文毅其一也同時有汪在豐沈德龍名稍亞於文毅又有諸生劉偁者字禹門博學工文弈技與在豐德龍相頡頏

程兆和

兆和字香谷武進人道光十五年舉人大挑一等安徽阜寧縣知縣工詞

陸慶頤

慶頤字鞠人武進人諸生績學能文嘗遊京師朝鮮使臣洪冠巖見其詩而善之持歸刊行於世主講川沙觀瀾書院爲講義以課生徒篤信朱子小學務求實踐

湯 璫

璫兄 琦

璫字子屋武進人諸生爲人靜潔峭直遇所拂忤雖貴介盛意折之工古文辭得魏晉人意尤精金石之學屢爲當道聘纂金石書及郡縣志任邱邊浴

禮以爲江南一人與兄珩字子獻齊名時稱二俊

薛子衡

子衡字子選武進人廩生館於劉逢祿家能私淑其學研求經訓易詩皆有論著謂逢祿詩聲衍及莊述祖古文甲乙篇皆釐訂序例分別部居而引徵未備欲補成之以客游死粵未能卒業

莊縉度

弟士彥

縉度字眉叔又字斐齋號黃雁山人陽湖人道光十六年進士官戶部主事發河工學習改同知浮沉宦海未竟其用工詩詞其自爲詩集序云二十五歲以前所作凡三千餘首刪存四百三十二首可以知其陶鍊之深蓋得金荃之韻玉溪之豔者弟士彥字眉生諸生以詩文名於時

呂佺孫

佺孫字堯仙陽湖人道光十六年進士官至福建巡撫凡所陳奏洞切事理蒐羅古軼甚富何紹基趙之謙均推爲海內藏軼家之冠

陳肇鏞

肇鏞字子俶武進人明善曾孫道光十七年舉人嗜金石圖籍所藏甚當時稱鑑賞家官至河南府知府宜陽盜張野貓築壘山中與汝南商洛羣盜通刻日爲亂肇鏞與知縣某從一騎直造其壘擒之登封盜魁梁甲伺令出襲縣城出繫囚殺令妻子郡邑大震肇鏞聞警馳援出不意平久之欲引年歸未行卒

史致澤

致澤字燮甫陽湖人道光十七年舉人穎悟過人工詩詞其屬對極工嘗以筮短龜長對環肥燕瘦

丁嘉葆

子紹基

嘉葆字誦孫武進人履恆子道光十八年進士選庶吉士散館授編脩奉特旨召見命在上書房行走授瑞郡王讀大考擢侍讀充日講起居注官教習庶吉士洊升左庶子二十六年視學貴州陞辭日獎勛甚至感激主知校士詳慎二十八年按試石阡以暑疾卒方卒遷侍講學士未及拜命於學無所不窺尤嗜金石文字詩承家學早歲卽哀然成集其通籍去鄉舉已十七年

故造詣益純子紹基字聽彝精金石之學

史致諤

致諤字士良號子愚陽湖人宛平籍道光十八年進士散館授編脩掌院倚以辦事兼國史方略諸館職凡鉅製盛典進奉文字一以委之二十八年授江西廣信府知府決留獄捕土豪除賦額脩考棚增號舍築隄護田設閘蓄瀉鄰郡有災集貲濟振以安流亡爲政期年百廢俱舉咸豐二年調權南昌是時粵賊竄長沙江西省垣震動致諤治團練稽保甲製軍械除德勝門外積沙築礮臺修城垣改造章江門濬城河及豫漳溝設懸門布渠答厥後粵匪圍南昌近百日江忠烈公督師赴援轉危爲安始知致諤守備先具之力冬後還廣信練信新軍會浙師屏蔽撫饒自貴溪肇守具濟南昌復調守南昌籌浙鹽餘息以充餉增月城礮臺汰章武軍入信新軍以備緩急時粵匪自九江上犯興國陷武寧致諤率信新軍偕浙江游擊常海敗賊於紫鹿嶺連敗之箬田復武寧楚軍失利於九江援師集南昌乏餉主客交鬪致諤爲之解紛弭釁籌軍火餉需逆酋石達開自楚入陷瑞臨袁吉撫建諸郡環省

皆賊致謬處以整暇賊不得逞六年將軍福興奉詔援贛駐軍廣信奏乞致謬自隨八年春致謬以乞餉抵常山值石達開竄圍廣豐牒請以同知李元度一軍會浙師解廣豐圍十年以道員入覲詔發浙江上書當事謂金衢嚴諸郡悉爲賊窟杭州圍急請以圍寧國之軍下擊嚴州以徽州諸軍應之閩中簡勁旅會衢防之師搗蘭谿以廣信防軍應之賊勢中斷杭圍必解當事各分畛域策不果行杭州陷同治元年左文襄公宗棠撫浙奏致謬權寧紹台道致謬謁李文忠公鴻章於上海文忠假以便宜致謬請挈洋將華爾同行時廣艇與法國兵構釁引賊陷慈谿寧波鎮海餘姚皆警致謬至寧波簡軍實籌釐捐率居民固守郡城推誠結洋將嚴約束檄華爾率常勝軍攻慈谿華爾所部鼓勇登城遂克慈谿奉化復陷致謬遴得都司楊應龍使募忠勇軍會郡人李鏐義勇連敗賊於橫溪石橋克奉化合兵搗上虞復之嵎新昌相隨而下乃謀規復紹興賊合七酋之衆與官軍夾曹江而軍官軍渡江敗賊於東關又敗之於夏家埠直抵紹興城下會洋將勒伯勒東死諸軍稍卻蕭山諸暨之賊來援官軍再戰盡殲之再薄紹城時左文襄大軍克金華

諸暨賊方蒂桂降遂復紹興與大軍會於錢江浙東平致諤於是親歷所部
飭吏治撫瘡痍雇輪艇以擊海盜設安瀾局以護海商稽旬月報以清釐稅
左文襄大軍饋餉每取給焉積功賞按察使銜賜孔雀翎經營數年海邦綏
定而致諤精力減耗矣自陳衰老五年冬詔以原官休致十一年卒年七十
一

吳自徵

自徵字月畊鄉舉名夢徵武進人宛平籍道光十七年順天舉人改歸原籍
大挑二等選鹽城教諭陞鎮江府教授少受業於王甌精舉業一本經義兼
工古文辭父德坊晚嬰末疾臥床十年自徵授徒供甘旨而自食草具

徐廷華

廷華字子楞陽湖人諸生負才氣而躡於場屋益精詩古文詞遊跡所至當
路引重晚年客死鄂中有一規八楞硯齋集以父賡揚與繕御製集成賜物
有一規八楞硯一取以名齋示傳硯意云

洪齡孫